

**Aprezentasaun husi Sr. Antonio Verdial de Sousa, Director DNPTSC iha
Seminariu La'õ Hamutuk nian iha Manatuto, 15 Janeiru 2010.**

**SAIDA MAK DTPSC MANATUTO NIA LIGASAUN HO PROSESU FOTI DADUS NO
OIN SA IDA NE'E ATU LAO BA OIN?**

- **Prosesu foti dadus kona-ba rai no nai'n ne'ebe hala'o iha Manatuto iha tinan rua kotuk nu'udar parte integradu husi Prosesu Nasional ba Levantamentu Dadus hodi Kria Baze de Dadus Nacional (Kadastro Nacional) ba propriedades iha Timor-Leste. Prosesu ida ne'e hala'o tuir politika Governu nian hodi hahu kria sistema administrasaun rai iha Timor-Leste.**
- **Nudar ita hotu hatene katak rai mak baze ba moris sosiedade Humano tan ne'e hanesan nasaun foun Timor-Leste presiza kria Sistema Administrasaun Rai ne'ebe modernu hodi hametin Direitu ba rai tuir artigu 54, Konstituisaun RDTL ne'ebe hateten katak Ema sidadaun hotu Timor-Leste iha direitu ba propriedade privadu iha Timor-Leste. Aleinde ne'e atu proteje direitu sidadaun nian atu sai nai'n ba rai no importante mos atu prevene konfliktu iha comunidade no kontribui ba dezvoltamentu iha Timor-Leste.**
- **Nudar Director nebe chefia DNTPSC, hau sente haksolok ho presensa prosesu foti dadus nebe halao tiha ona iha Kapital Distrito Manatuto iha tinan rua kotuk. Hau mos haksolok tan Distrito Manatuto fo tiha ona nia kontribuisaun hodi aselera prosesu ida ne'e to'o ramata sem regista problema signifikantes ruma. Ida ne'e hatudu katak Ema Manatuto oan sira kontribui tiha ona ba prosesu importante ida hodi estabeselese sistema administrasaun rai iha Timor Leste. Hau nia apresiasaun no agradelementu ba kontribuisaun bo'ot ida ne'e.**
- **Nudar Director DNTPSC hau hakarak hateten ba ita boot sira iha seminar ida ne'e katak:**

Prosesu foti dadus kona-ba rai no nai'n ba rai ne'ebe halao iha Capital Distrito Manatuto durante ne'e halao ho transparentes tebes no hetan apoiu no kolaborasaun diak tebes husi ema no komponentes hotu:

Programa Ita Nia Rai hahu prosesu ne'e ho kuidadu tebes hodi loke oportunidade ba aproximasaun no fornese informasaun klaru tebes ba

na'in ba rai molok halao prosesu sukat rai nebe kritiku no komplikadu ne'e. Programa Ita Nia Rai halo kordenasaun no servisu hamutuk ho komponentes hotu iha Manatuto hahu husi Administrador Distrito, DTPSC, Administrador Sub Distrito, Xefe Suco no Konsellu do Suco sira liu husi atividades hanesan enkontru publika, Enkontru Komunitarius husi area ba area koleksaun hodi informa prosesu molok halao foti dadus. Programa Ita Nia Rai mos sempre involve DTPSC Manatuto hahu iha prosesu halo desizaun nian to'o iha atividades sira hanesan fahe informasaun no halo rezolusaun ba (mediasaun) ba disputa ruma nebe mosu iha comunidade.

Programa Ita Nia Rai dadaun ne'e ramata ona prosesu foti dadus maibe kontinua nia knar hodi kompleta servisu sira nebe seidauk hotu no prepara halo kapasitasaun no transparensia dadus ba DNTDSC no DTPSC Manatuto iha tinan ida ne'e nia laran. Parte ida husi kapasitasaun mak nudar ita hotu hatene katak Manatuto nia oan lubun ida mak hetan tiha ona treinamentu oi-oin no implementa rasik prosesu foti dadus iha Manatuto. Ita hein katak iha future ita bele kontinua fo konfiansa ba sira atu halao servisu ne'e iha futuro.

Antes atu hakotu hau nia apresentasaun hau hakarak hateten katak sorte ba Timor Leste hodi hetan apoiu importante ida ne'e. Prosesu ida nebe halao sistematika duni maibe gratuita ho livre. Povu simples no kiak inklui povu riku sira mos la presiza gasta tempu atu buka agrargia sukat nia rai hanesan tempu uluk no la presiza gasta osan hodi selu prosesu ne'e maibe kustus hotu Estado mak responsabiliza. Ida ne'e nudar fundasaun ida importante hodi hahu estabelese sistema administrasaun rai iha Timor Leste.

Aban bainrua Governu sei uza duni baze de dadus ida ne'e atu halo avaliasaun no fo rekuinementu hanesan titulu ba nai'n ba rai sira. Ita hein katak tinan ida ne'e bele iha ona lei rai nian ida atu nune bele loke oportunidade liu tan ba prosesu rekuinesementu ka fo titularidade ba maluk nai'n ba rai sira iha Timor Leste.

Obrigado